

Un esfuerzo conhunto di Parlamento y Gobierno pronto lo bira realidad

ORANJESTAD (AAN) – Den conferencia di prensa di fraccion di PDR, mr. Andin Bikker a indica cu Aruba ta mas cerca di e conexion cu e fast ferry entre Curacao, Aruba y Bonaire.

El a duna di conoce cu durante e reunion tripartite entre Aruba, Sint Maarten y Curacao, su persona como encarga cu e tema di economia a bolbe subraya riba esey. Informacion cu mr. Bikker tin ta indica cu nan ta un tiki mas leu awor, pasobra e dossier a wordo aproba siman pasa.

Esaki ta nifica cu Aruba ta practicamente cla, y awor e otro islanan tin cu presenta nan compromiso, ya cu tur



isla a firma un memorandum di entendimiento. E Islanan di Aruba, Bonaire y Curacao tin cinco aña trahando riba esaki, y a base di iniciativa e comision tambe

a reuni cu e grupo cu ta traha riba “happy flow” y tur e proceso di aceleracion pa mas rapido posible e pasahero por yega na su destino, y tur esaki ta combina.

Parlamentario mr. Bikker a subraya cu aworaki nan ta yegando na un fase hopi crucial pa e proyecto aki.

E parlamentario, pa duna un ehemplo so, a señala cu e ferry aki por carga mas cu mil pasahero, 450 truck, 121 auto y e ta navega na un average di 70 kilometer pa ora, kiermen den dos ora y 15 minuut e ta yega di Aruba pa Curacao y di Curacao pa Bonaire den menos cu esey. E ta bay ta un servicio di un biaha pa dia den siman y den fin di siman, dos biaha. E parlamentario a remarca cu e servicio di fast ferry interinsular aki ta bay engrandecé e economia di e Islanan ABC, pasobra

e flete ta bay bira mas barata, e mercado mas grandi, entre otro. Un sistema asina a wordo aproba entre e Islanan Canarias y nan economia a crece como cinco biaha mas tanto. E islanan aki ta mesun grandi cu nos Islanan ABC y su lama di mesun tipo. Pesey PDR su fraccion ta keda insisti riba e proyecto aki y nan ta contento cu Gobierno di Aruba tambe ta dunando di su banda, despues cu na un inicio a mustra poco interes. Esaki ta un di e esfuerzonan mutuo di Parlamento y Gobierno pa yega na un servicio di fast ferry cu ta na beneficio di nos pueblonan, segun mr. Andin Bikker.